

# Канон пред иконой Пресвятой Богородицы «Отрада и Утешение»

Празднуется 21 января (3 февраля)

Тропарь, глас 4-й

К Богородице прилѣжно ныне притецѣм, грѣшнии и смиреннии, и припадѣм, в покаянии зовуще из глубины души: Владычице, помози, на ны милосердовавши, потщися, погибаем от множества прегрешений. Не отврати Твоя рабы тщи, Тя бо и едину надежду имамы.

КАНОН, глас 8-й

Песнь 1

*Ирмос:* Воду прошед, яко сушу, и египетскаго зла избежав, израильтянин вопиаше: Избавителю и Богу нашему поим.

*Припев:* Пресвятая Богородице, спаси нас.

Божиею благодатию озари мя, Богоблагодатная, благоговейно пети пред святою иконою Твоею Тебе, небориму Заступницу и державу неразрушиму стада Твоего.

Пресвятая Богородице, спаси нас.

Тя, Всенепорочная, имамы предстательство, Отраду же и Утешение. Сего ради, славяще благодать Твою, молимтися: помилуй нас.

Пресвятая Богородице, спаси нас.

Хранительница сущи Горы, нашедшим разбойником на обитель Ватопедскую не предала еси, Господже, рабов Твоих в руки вражия.

Пресвятая Богородице, спаси нас.

Кто подобен Тебе, Дево, славно творящая чудеса? Наставив бо иноки правдою Сына Твоего, еже боятися Его, избавила и утешила еси их крепостию Твоею.

Слава: Врачевско есть еже резати и жещи, здравия виновное, но Ты нас, Сыне Божий, мягкими лечбами щедрот Твоих уврачуй, Матере Твоея мольбами.

И ныне: Услыши, Благая, мольбы христоименитых людей, призри на озлобление утесняемых, виждь слезы сущих в скорбех и умилосердись потщися на рабы Твоя.

### Песнь 3

*Ирмос:* Ты еси утверждение притекающих к Тебе, Господи, Ты еси Свет омраченных, и поет Тя дух мой.

Пресвятая Богородице, спаси нас.

Под кров Твой притекаем, людие Твой, Заступница буди нам, Владычице, подающи отраду и утешение поющим Тя.

Пресвятая Богородице, спаси нас.

Возвеселишася ватопеды о спасении Твоем, Дево, немощствующих бо препоясала еси силою на прогнание разбойников.

Пресвятая Богородице, спаси нас.

Не престай, Семилостивая Госпоже, спасти рабы Твоя от нечаемых напастей, да благодарственно славим Тя.

Пресвятая Богородице, спаси нас.

Моли, Богородительнице, еже избавитися нам всякаго гнева и прещения Божия, Тебе почитаемым.

Слава: Ходатаица благоприятная и сильная к Богу, прегрешений оставление испроси нам у Него, Богоневесто.

И ныне: Смертоносных недугов душевных и телесных изми ны, Владычице, вечнующую Жизнь миру рождающая.

Господи, помилуй (*трижды*). Слава, и ныне:

Седален

Видимыми и невидимыми враги окружаемии, к Тебе, Дево, прибегающе, зовем: не удали помощь Твою от нас, якоже от иноков ватопедских не удалила еси, но державною силою Твоею побори борущия ны, мирное и богоугодное житие нам устрояющи.

### Песнь 4

*Ирмос:* Услышах, Господи, смотрения Твоего таинство, разумех дела Твоя и прославих Твое Божество.

Пресвятая Богородице, спаси нас.

Убоясь сердце игумена в молитве устен его от гласа Твоего, Богомати, и прещения Сына Твоего, и смятеса крепость его возвещену бывшу нападению от разбойников.

Пресвятая Богородице, спаси нас.

Внегда смутитися Ватопеду во гневе Твоем, Господи, милость Твою помянул еси предстательством Приснодевы, от Неяже явился еси на спасение людей Твоих.

**Пресвятая Богородице, спаси нас.**

Не предаждь в руки врагов наследие Твое, Чистая, да не когда рекут: где есть Богородительница, на Нюже уповаша? Но невредно и ненаветно соблюди стадо Твое.

**Слава:** Святому образу Твоему припадающе, молим Тя: разори советы хотящих нам злая и живот наш направи творити в мире Божественную волю Сына Твоего.

**И ныне:** Во искушениях буди нам, Владычице, спасительное прибежище, в болезнях врачевание, во обуревании тихое пристанище и в скорбех Отрада и Утешение.

### Песнь 5

**Ирмос:** Вскую мя отринул еси от лица Твоего, Свете Незаходимый, и покрыла мя есть чуждая тьма, окаяннаго, но обрати мя и к свету заповедей Твоих пути моя направи, молюся.

**Пресвятая Богородице, спаси нас.**

Стену тверду и столп непоколебим Тя имать Горы в нашествиих варварских: студа бо исполняеши вражия лица и возвращатися твориши им вспять тщетным и бездельным, Владычице.

**Пресвятая Богородице, спаси нас.**

Матернее промышление о сущих в Горы имущей Ти, страха ради Сына Твоего, Дево, поболел Ватопед, уведев о разбойниках, и родил дух спасения предстательством Твоим, Преподобная.

**Пресвятая Богородице, спаси нас.**

Якоже настоятеля Ватопедскаго, по утрени бдѣвша и молившася, наставила еси, Благая, како спастися от напасти, тако и нам подаждь тщание от нощи утреневати к Богу и ко спасению настави ны, избавляющи от всех бед.

**Пресвятая Богородице, спаси нас.**

Якоже запретила еси, Госпоже, отверзати врата готовой сущей погибели от врагов, тако положи в нас благодатную дверь ограждения, да не обрящется входа всезлым губителем и их плевелом.

**Слава:** Якоже повелела еси, Владычице, возшедше на стены, разгнати разбойники, тако укрепил быти нам на четверостении мужества и правды, мудрости и целомудрия, да отражаем борющия ны.

**И ныне:** Якоже умилостивила еси, Дево, Сына Твоего, прогневавшася на сущия в Ватопеде, тако умилостивляй Его о нас, во многия грехи впадающих, много бо может моление матернее ко благосердию Владыки.

## Песнь 6

**Ирмос:** Молитву пролию ко Господу и Тому возвещу печали моя, яко зол душа моя исполнися и живот мой аду приближися, и молюся, яко Иона: от тли, Боже, возведи мя.

Пресвятая Богородице, спаси нас.

Возвещающе Ти печали наша, молимтися, Мати Божия: обвесели благодатию Твоею скорбящих сердца, всех Радосте, и от тли возведи ны.

Пресвятая Богородице, спаси нас.

Не стяжухом на земли иного утешения и крепкаго заступления, разве Тебе, Всеблагая, покрый убо от всякаго зла любовью воспевающих Тя.

Пресвятая Богородице, спаси нас.

Благостыню и милость приемлем от Сына Твоего, Дево, молитвами Твоими: от молвы бо храниши ны, смущения, ловитвы и всякаго коварства вражия, Всепетая.

Слава: Мiру Спасительнице, необоримою силою Твоею не престай соблюдать стадо Твое, зовущее: Отрада и Утешение наше Ты еси, Благословенная.

И ныне: Всех благих вина, смертных оживление, погибших взыскание, избави, Госпоже, рабы Твоя от напрасныя смерти и от тли греховныя возведи ны.

Господи, помилуй (*трижды*). Слава, и ныне:

Кондак, глас 8-й

Взбранной Воеводе победительная, яко избавльшися от злых, благодарственная восписуем Ти, раби Твои, Богородице, но, яко имущая державу непобедимую, от всяких нас бед свободи, да зовем Ти: Радуйся, Невесто Неневестная.

Икос

Ангели Тя, Матерь Бога нашего, песньми славословят, и мы, земнии, воспоем, радостно Тебе вопиюще: радуйся, Светодавца селение, Еюже лучи спасения миру возсияша; радуйся Обрадованная, Еюже исполняем Божественнаго веселия. Радуйся, двере Востока, от врат смертоносных греха нас отводящая; радуйся, светильниче пресветлый, просвещаая омраченных. Радуйся, бездно Божия к нам человеколюбия; радуйся, цени всякия превышший дар, нам от Бога дарованный. Радуйся, яко имаши велие к Немю дерзновение; радуйся, страже Афона и тамо обитающих Хранительнице. Радуйся, всекрепкая стено, Еюже сохраняем неборимы враги христианскими; радуйся, язво

невидимых врагов и от них уязвляемых врачевание. Радуйся, бессильных сило и помощи беспомощных; радуйся, Отрадо и Утешение скорбящих. Радуйся, Невесто Неневестная.

#### Песнь 7

*Ирмос:* От Иудеи дошедше, отроцы в Вавилоне иногда верою Тройческою пламень пещный попраша, поюще: отцев Боже, благословен еси.

Пресвятая Богородице, спаси нас.

Воплощся от утробы Твоея Господь, господствуяй тварю, и Тебе, Дево, Госпожу покажи видимым же всем и невидимым, яко Матерь Свою прославляя Тя.

Пресвятая Богородице, спаси нас.

Согрешихом, Господи, но не отступихом от Тебе и иного не ведем, разве Тебе, не предаждь нас до конца Матере Твоея мольбами, отцев Боже благословенный.

Пресвятая Богородице, спаси нас.

Гора Божия осененная, Всечистая, покрый сущия в Горы сению Твоих молитв и от сети ловящих избави поющия: отец наших Боже, благословен еси.

Слава: Непобедимая еси крепость, Госпоже, и несокрушимое ограждение с верою призывающих Тя: разрушаеши бо советы вооружающихся на славящих Тебе.

И ныне: Унывающим Отрадо, печальным Утешение, заблуждающим Наставнице, соблюди нас, Дево, от всякаго зла, чтущих святыи образ Твой.

#### Песнь 8

*Ирмос:* Царя Небеснаго, Егоже поют вси ангельстии, хвалите и превозносите во вся веки.

Пресвятая Богородице, спаси нас.

Преблагословенная Мати Всещедраго Бога, ущедри ны, недостойныя, дарамы милосердия Твоего, да превозносим Тя во веки.

Пресвятая Богородице, спаси нас.

Крепость и держава буди рабом Твоим, Всецарице, сила, оружие и меч, враги спасения секущий, да славим Тя во веки.

Пресвятая Богородице, спаси нас.

Сияющая паче Ангел святынею, храни нас, Всенепорочная, от греховных деяний, глаголений и помышлений, да благословляем Тя во

вѣки.

**Пресвятая Богородице, спаси нас.**

**Освятѣ, Всесвятая, благоговѣйно лобызающих святую икону Твою и Твоим матерним дерзновением милостива нам твори Сына Твоего, да поем Его во вѣки.**

**Слава: Отрадо и Утешение молящихся Тебѣ, временных и вечных лютых избави ны, да хвалим Тя и Сына Твоего превозносим во вся вѣки.**

**И ныне: Путь и Живот, Дѣво, рождающая, стопы наша направи по словеси Божію, да, живот вечный наследовавше, поем Тя, Сына Твоего превозносяще во вся вѣки.**

### Песнь 9

**Ирмос: Проявленное на горѣ законоположнику во огни и купинѣ Рождество Приснодѣвы в наше, верных, спасение песнями немолчными величаем.**

**Пресвятая Богородице, спаси нас.**

**Веселися, Ватопѣде, неусыпная бо Афона Назирательница яже на Тя коварство вражие манием Своим разруши и изгнанны сотвори разрушение Тебѣ уготовавшая.**

**Пресвятая Богородице, спаси нас.**

**О великаго дерзновения Твоего, Дѣво, к Богу и благоутробия к рабам Твоим! Возвещаючи бо о вразех, уклонила еси лице Свое от руки Сына Твоего, якоже донѣне зриши на иконѣ Твоей.**

**Пресвятая Богородице, спаси нас.**

**Поток светлости, отрады и утешения неистощимый Ты еси, Богорадованная Мати Света, тьму убо страстей прожени от нас, обстоящих светлое подобие лица Твоего, и несветимаго огня избави.**

**Пресвятая Богородице, спаси нас.**

**Спасение буди присное, Госпожѣ, от враг наших и из руки всех ненавидящих нас и направи ноги наша на путь мирен милосердия ради милости Сына Твоего и Бога нашего, Преблагословенная.**

**Слава: Владычествующая всеми яко Всецаря Матерь, стране нашей подаждь благоденствие, мир, спасение и на сопостаты победы и одоление.**

**И ныне: Молѣбное пение от души принесох со страхом Тебѣ, Дѣво, рождающей Христа Бога, Егже молящи, благоприятна сотвори моления наша, да Тя песнями немолчными величаем.**